



**RAUMA KOMMUNE**  
**Miljø Næring**

Landbruksdepartementet  
Postboks 8007 Dep  
0030 OSLO

|                        |                 |
|------------------------|-----------------|
| Landbruksdepartementet |                 |
| Saksnr.: 2003 103127   | Dokumentnr.: 50 |
| Åndalsnes 22.06.2004   |                 |
| Mottatt: 24 JUN 2004   |                 |
| Saksnr.: ASR/JUR/EDA   | Ark.: 440       |
| Avskr.:                |                 |

Deres ref.:

Vår ref.: 04/1417-2

Arkiv: K2-V62

## HØRING NOU 2003:26 - OM ODELS- OG ÅSETESRETTE

Uttale frå Rauma kommune til NOU 2003:26 om odels- og åsetesretten ligg ved.

Med hilsen

Gerd Dale  
jordbrukssjef  
tlf. dir. 71 16 66 69

# Rauma kommune

## SAKSPAPIR

| Styre, utvalg, komite m.m.                        | Møtedato | Saknr  | Saksbehandler |
|---|----------|--------|---------------|
| Utvalg for Utbygging Teknisk drift Natur og Miljø | 16.06.04 | 089/04 | GED           |

|                            |                          |                          |
|----------------------------|--------------------------|--------------------------|
| Saksansvarlig<br>Gerd Dale | Arkiv: K2-V62<br>Objekt: | Arkivsaknr<br>2004001417 |
|----------------------------|--------------------------|--------------------------|

### HØYRING - NOU 2003:26 - OM ODELS- OG ÅSETESRETTE ODELSLOVUTVALET SI INNSTILLING

NOU 2003:26 er eit omfattande dokument på 174 sider. Den finst på internett: <http://odin.dep.no> – publikasjoner – utredninger – nou. Vi har også eit eksemplar til utlån på næringsavdelinga.

Saksutgreiinga er i stor grad bygd på saksutgreiinga til møte i Fylkeslandbruksstyret i Møre og Romsdal ved sakshandsamar Aud-Ingrid Krefting.

#### Utvalet sitt mandat:

Odelstovutvalet fekk den 21. september 2001 i oppdrag å evaluere verknader av og fremme *forslag til endringar i odelslova*. Vidare fekk Utvalet eit tilleggsmandat frå landbruksminister Lars Sponheim den 2. april 2003: *Å vurdere om odelsretten bør bestå eller avviklast*. Åsetesretten (spørsmålet om kven av livsarvingane etter eigar av landbrukseigedom som skal få ta over landbrukseigedom på skiftet, var ikkje omfatta av sistnemnde tilleggsmandat.

#### Samandrag:

Odelstovutvalet har lagt fram sine forslag til modernisering av odelslova i NOU 2003: 26. I korte trekk (utgreiinga side 17) har Utvalet levert ei *samrøystes* utgreiing innafor det opprinnelege mandatet sine rammer – med unntak av følgjande:

1. Eit fleirtal på fem vil heve arealkravet til odlingsjord frå noverande 20 dekar jordbruksareal til 50 dekar. Eit mindretal på tre vil heve arealkravet frå 20 dekar til 30 dekar.
2. Eit mindretal på tre vil avgrense odelskrinsen på den måten at berre barn av foreldre som har eigd garden med odelsrett får odelsrett.
3. Utvalet er delt på midten med omsyn til om føresegnene om bu- og driveplikt framleis bør plasserast i odelslova, eller om dette regelverket bør flyttast til konsesjonslova.

Når det gjeld tilleggsmandatet om odelsretten bør bestå eller ikkje, har Utvalet delt seg: Eit fleirtal på seks meiner odelsretten bør bestå, medan mindretalet på to meiner odelsretten bør avviklast.

For det tilfellet at odelsretten blir ståande, har Utvalet komme med ei rekkje forslag til endringar. Nokre av desse er til dels inngripande, andre er av mindre betydning. Dei viktigaste endringsforslaga er nemnt på side 17, pkt. 2.2.2 i utgreinga:

- auke og klargjere grensa for kva eigedomar som er odlingsjord
- redusere den alminnelege løysingsfristen til seks månader
- adgang til å kreve at dei odelsberettiga innan to månader tar standpunkt til om dei ønskjer å ta over eigedomen, og i motsett fall gi eigaren adgang til å overdra eigedomen utan at den seinare kan løysast av dei som har odel
- innføring av full likestilling mellom kjønna uavhengig av fødselsdato, samt som hovudregel mellom adoptivbarn og barn fødde innafor og utanom ekteskap
- opning for at sambuande skal kunne samodle og at også sambuande skal vere verna om den odelsberettiga døyrr
- utvide adgangen til å nekte odelsløyising der dette vil verke urimeleg, m.a. der samiske rettstradsjonar gjer seg gjeldande

I tillegg har utvalet fremma ei rekke forslag til forenklingar og klargjeringar av lova.

I det følgjande vil spørsmålet om odelsretten skal bestå eller ei bli behandla først. Deretter drøftar ein dei viktigaste endringsforslaga for det tilfellet at odelsretten blir ståande.

### **Spørsmålet om odelsretten bør bestå eller ikkje ( kap 12 s. 160)**

Odselsrett er ein privatrettsleg *særrett* for den slekt som gjennom ei viss tid har hatt tilknytning til ein bestemt landbrukseigedom, og slik at det mellom dei i slekta som har odelsrett, er ei rangordning (prioritetsrekkefølgje). Særretten inneber

- ein *fortrinnsrett* til å ta over odelseigedomen på arveskifte,
- *løysingsrett* når eigedomen ved frivillig disposisjon eller tvangssal kjem ut av slekta
- løysingsrett for den betre prioriterte overfor den dårlegare prioriterte ervervar av eigedomen.

Odselsretten kan seiast å vere meir enn ein rein funksjon av regelverket – ein sentral sideeffekt er at odelsretten pregar haldningane og målsettingane til næringsutøvarar i landbruket.

Utvalet er som nemnt innleiingsvis delt i synet på om odelsretten bør bestå eller ei: Fleirtalet på seks meiner at odelsretten bør bestå – medan eit mindretal på to meiner odelsretten bør avviklast.

*Fleirtalet* si grunniving ligg mellom anna i at odelsretten gir betre landbruk. Dette på bakgrunn av kjenslemessig tilknytning til garden, som saman med den tryggleik og mulegheita til sikker planlegging som odelsretten gir, skaper grobotn for godt landbruk. Likeså viser fleirtalet til at det oftare er positiv næringsinntekt, og høgare næringsinntekt, på bruk som er drivne av odelsrettshavarar enn andre brukarar.

Fleirtalet meiner også at odelsretten har ført til at landbruksareal framleis blir eigd av einskildpersonar, og at ein i mange samanhengar legg til grunn at odelsretten held oppe busetnaden i distrikta med lokalt eigarskap til landbruksjord. Fleirtalet trur vidare at nedgangen i talet landbrukseigedomar med aktiv drift vil føre til at landbruket får mindre betydning for busetnaden i framtida; og at odelsretten difor vil ha avgrensa betydning i forhold til desse kreftene.

Fleirtalet meiner at odelsretten speler ei svært viktig rolle i forhold til likestilling mellom kjønna.

Fleirtalet har merka seg dei negative sidene ved odelsretten: Høgt konfliktpotensial, høgt kjenslemessig engasjement, avgrensing av eigaren sin råderett, usikkerheit for ervervarar og at odelsretten verker ekskluderande (ein får eit rettsleg fortrinn i kraft av fødselstidspunkt).

Fleirtalet meiner likevel at odelsretten utan tvil har fleire og tyngre samfunnsmessig gunstige effektar enn ulemper. Det blir særleg vist til sosiokulturelle verdiar i tilknytning til dei haldningar og langsiktige målsettingar som er karakteristisk for dei som har arbeidet sitt i landbruket – herunder i relasjon til spørsmålet om likestilling og betre landbruksdrift. Vidare vil dei endringane som er sett fram i forslaget redusere dei uheldige sidene ved odelsretten vesentleg. Totalt sett vil odelslova etter fleirtalet si meining vere eit viktig instrument for å sikre langsiktig planlegging og stabilitet for landbruket, samt å bidra til samfunnsmessig ønska verknader.

Avslutningsvis kjem fleirtalet med merknad om at *åsetesretten* har ei avgrensa betydning ved eigarskifte i landbruket i dag, då dei fleste eigarskifta på landbrukseigedom av næringsmessig betydning i praksis skjer medan eigar er i live.

*Mindretalet* er som fleirtalet samd i at odelsretten er ein viktig del av vår rettslege kulturarv, men meiner dette i seg sjølv ikkje er tilstrekkeleg grunnlag for å oppretthalde odelsretten i dagens samfunn.

Mindretalet meiner det er vanskeleg å føre eksakt bevis for dei gunstige samfunnsmessige verknader fleirtalet påstår odelsretten gir. Mindretalet meiner at det ikkje er klare skillelinjer mellom arbeidsplass og heim, og mellom arbeidstid og fritid. Dette pregar naturleg nok tilknytninga til garden. Spørsmålet er om odelsretten er med på å styrke denne tilknytninga på ein slik måte at ein får eit auka samfunnsmessig vinning av landbruket. Etter mindretalet si meining er det ikkje sannsynleg at odelsretten har så stor betydning for eit betre landbruk, samanlikna med kva ein ville fått utan odelsretten.

Mindretalet peiker på at bu- og driveplikta som eit verkty for å få samfunnsmessig gunstige verknader er eit reelt nytt element ved samfunnet sin kontroll med utnyttinga av fast eigedom (kom inn i lovgivinga i 1974). Mindretalet meiner at dei omsyn som ligg bak bu- og driveplikt i odelslova kan bli stetta på ein vel så god måte gjennom konsesjonslovsystemet, og at odelsretten å så måte ikkje har nokon sjølvstendig tyding her. Vidare seier mindretalet at samfunnskontrollen med eigedomsstruktur og eigartilhøve også kan bli stetta gjennom konsesjonslov saman med jord- og skoglov.

Ei føresegn om likestilling mellom kjønna (fleirtalet sitt forslag) – med den signaleffekt dette gir - er etter mindretalet si oppfatning ikkje ein faktor som i våre dagar kan tilleggast vesentleg betydning når mandatet er å greie ut om det odelsrettslege system skal oppretthaldast.

Mindretalet peiker på at odelsretten i mange tilfelle skaper problem og konflikter.

I totalvurderinga meiner mindretalet at det i dag ikkje let seg forsvare at oppimot 80% av landbrukseigedomane (– dersom ein legg Landbruksdepartementet sine tal til grunn –), med dyrka mark og store skog- og utmarksstrekningar – skal vere odelsjord. Det vil seie at det gjennom fødsel er ein stadig snevrare krets av personar med fortrinnsrett til desse verdiane. Mindretalet aksepterer at odelsretten har gunstige verknader, men meiner at desse ikkje kan

vere tilstrekkeleg til å rettferdiggjere brotet på likestillingsprinsippet. Dette gjeld særleg fordi mange av fordelane kan takast vare på gjennom andre verkemiddel, m.a. konsesjonslova, med rom for kontroll med erverv av landbruksareal og priser, samt etablering av bu- og driveplikt for slike eigedomar.

### **Vurdering:**

Sakshandsamar er samd i fleirtalet si vurdering av at åsetesretten har avgrensa betydning med omsyn til overdraging av landbrukseigedom av næringsmessig verdi, då overdraging av slike eigedomar oftast skjer i eigar si levetid.

Ein har registrert at tal dekar leigeareal på landsbasis er aukande. 50% av bruka på landsbasis er avhengig av at minst ein av ektefellane har arbeid utanom garden. Gardane har fått mindre betydning som arbeidsplass, fleire eigarar vel å arbeide utanom garden eller er avhengig av arbeid utanom garden av strukturmessige årsaker.

Det ser ut til å vere eit aukande ønskje om at eigar av landbrukseigedom organiserer verksemda si i samsvar med kva andre næringar gjer. Gjennom politiske signal og økonomiske/juridiske verkemiddel blir gardeigaren stimulert til å handle som ein kvar annan næringsutøvar. Ulike samarbeidsformer innafor landbruket er også ein faktor her. I denne samanheng må gardeigaren sjå på mulegheitene for å avgrense risiko ved investeringar. Opphøyr av samliv og tvangssal er ein realitet også innafor landbruket. Tvangssal av landbrukseigedomar med odell gir jamt over ein lågare marknadspris enn sal av landbrukseigedom utan odell. Odelsretten kan på denne måten avgrense eigaren sitt handlerom i forhold til å skape ein best muleg arbeidsplass/næringsinntekt. Dette er lite i samsvar med dagens samfunnsutvikling, som stiller stadig større krav til effektivitet og raske skifte.

Samfunnskontrollen med eigar- og brukstilhøva i landbruket kan styrast gjennom konsesjonslova saman med jord- og skoglov, dersom dette er ønskjeleg.

Sakshandsamar meiner at dei fleste eigedomar framleis vil bli selt innan familien, sjølv om odelsretten skulle bli avvikla. Det betyr at odelsretten ikkje vil ha avgjerande vekt i høve til kven ein vil kome til å selje garden til.

Odelsretten har eit konfliktskapende potensiale. Det er eit jamt, høgt tal førespurnader ikring temaet, og signala frå eigarar av landbrukseigedom er at odelsretten i mange høve er ei stor kjelde til usikkerheit og usemje. Odelsretten kan i mange høve seiast å vere meir retta inn mot å ivareta omsynet til slekta og dei som ikkje driv gard, enn å sikre ei framtidsetta utvikling i landbruket der eigaren har interesse for landbruksdrifta. Det er mange eksempel på at unge som er interessert i landbruksdrift blir skuva til side av slektingar/andre med betre odelsrett, men der desse har mindre landbruksfagleg kompetanse og interesse. Framtida sitt landbruk vil stille strenge krav til yrkesutøvarane, og andre omsyn enn odelsrekkefølga bør såleis styre eigartilhøva i næringa.

Odelsretten kan bidra til auka likestilling mellom kjønna innan landbruket, men dette kan ikkje aleine legitimere vidareføring av retten.

*Ut frå det som står ovafor, meiner jordbrukssjefen at odelsretten bør avviklast som rettsinstitutt.*

**Under føresetnad at odelsretten blir vidareført:**

Utvalet sitt opprinnelege mandat var m.a. å vurdere om odelskrinsen bør innskrenkast, om løysingsfristen bør bli kortare, samt verknadene av odelslova sine føresegnar for kvinner sin situasjon i landbruket. Utvalet skulle også vurdere om odelslova fører til ei konservering ("lukking") av landbruket, korleis odelslova verkar inn på lokalt eigarskap og busetnad, om det skulle utformast ei formålsføresegn, og kva som er odlingsjord. Til sist skulle Utvalet kome med ev. forslag om lov- og regeltekniske forenklingar av dei offentlegrettslege reglane, med sikte på å få kortare saksbehandlingstid ved offentleg myndeutøving.

### **Odelslova § 2 – arealkrav**

*Fleirtalet* på fem foreslår å auke noverande arealkrav på 20 dekar jordbruksareal eller minst 100 dekar produktiv skog til 50 dekar jordbruksareal eller minst 1.000 dekar produktiv skog. Utvalet forslår også ei viss forenkling i høve til dagens "kompensasjonsareal" – i noverande § 2 nemnt som "anna areal, rettar og lunnende" som gjer at *eigedomens* produksjonsmessige verdi tilsvarar minst 20 dekar jordbruksareal".

*Fleirtalet* meiner at grensa for odlingsjord bør settast ut frå objektive kriterium, og at dette best gjerast ved å sette ei minstegrense for eigedomen sitt produktive areal. Denne bør settast så høgt at ein i all hovudsak stenger for ferieeigedomar. *Fleirtalet* trur at ei auke i arealgrensa for odlingsjord kan bidra til auka omsetnad av mindre landbrukseigedomar og tilleggsjord.

*Mindretalet* (tre) går inn for ei auke i arealkravet til 30 dekar jordbruksareal eller minst 500 dekar produktivt skogareal. Dei grunnir sitt forslag med at det er store skilnader i eigedomsstruktur i dei ulike delane av landet, og at ei markert auke i arealgrensa for odelseigedomar vil føre til at ein relativt stor del av landbrukseigedomane i einskilte delar av landet ikkje vil bli odelseigedomar. *Mindretalet* er elles samde med *fleirtalet* om at grensa for odlingsjord bør settast ut frå objektive kriterium.

Dersom lova blir endra i samsvar med innstillinga frå Utvalet, vil talet på odelseigedomar bli vesentleg redusert. Møre og Romsdal hadde i 2002 totalt 14.268 "landbrukseigedomar" (frå og med 5 dekar jordbruksareal). Av desse har 9.092 mindre enn 50 dekar jordbruksareal. På landsbasis vil talet odelsbruk gå ned frå om lag 130.000 – 140.000 odelsbruk til om lag 80.000 – 90.000 odelsbruk.

Det vil vere viktig at den nedre grensa for kva som er odlingsjord er knytt opp til fastare kriterium. Ei heving av arealgrensa i tråd med *mindretalet* sitt forslag blir nokså lik grensa slik den er i dag.

*Jordbrukssjefen* er eining med *fleirtalet* sitt forslag om å heve arealgrensa for odlingsjord til 50 dekar jordbruksareal/1.000 dekar produktiv skog.

### **Odelslova § 4 – presiseringar**

Utvalet foreslår at sambuarar på nærare gitte vilkår kan samodle ein eigedom, og at sambuande skal vere verna når den med odelsrett døyr. Endringa høyrer redaksjonelt til under forslaga til ny § 15.

Etter odelslova § 4 odlar som hovudregel ektefellar i fellesskap odelsrett til ein eigedom når dei ervervar den under ekteskapet. Føresetnaden for dette er at eigedomen høyrer til det ekteskapelege felleseiget (i motsetnad til særlege). Praktisk sett kan det seiast at samodling i dag føresett at ein av ektefellane eller begge i fellesskap – under ekteskapet – ervervar odlingsjord frå nokon utanfor slektene til ektefellane.

Utvalet meiner at det med dei rettsreglar som elles gjeld for sambuarar og dei generelle oppfatningane som rår vedkomande likestilling mellom ekteskap og etablerte sambuarforhold, bør mulegheitene for samodling utvidast.

Utvalet sitt endringsforslag inneber at der ein står overfor eit eigedomserverv som kunne gitt grunnlag for samodling mellom ektefellar, skal også sambuande kunne samodle. Dei nærare vilkåra for samodling er: At ervervet skjer etter at sambuarforholdet er etablert, at dei eig like stor part, at dette eigarforholdet varer i 20 år (med visse modifikasjonar), at sambuarforholdet er dokumentert gjennom felles adresse i folkeregisteret og er reelt, og at det er eit ekteskapsliknande sambuarforhold (sysken kan ikkje samodle).

Verknaden av fullført samodling er som for ekteskap – det tyder at dei får lik odelsrett, og at fellesbarn/særkullsbarn får odelsrett.

Odelslova §§ 34-39 har reglar om vern av attlevande ektefelle utan odel overfor dei med odelsrett. Etter Utvalet si meining bør også attlevande i sambuarforhold ha krav på vern når sambuarforholdet har vore ekteskapsliknande, og attlevande har ei tilknytning til eigedomen som kan samanliknast med den som gir attlevande ektefelle vern.

*Jordbrukssjefen sluttar seg til Utvalet sitt forslag.*

### **Odelslova § 8 – odelslekta**

Gjeldande lov § 8 seier kven som har odelsrett i tillegg til den som sitt med eigedomen idet odelshevdstida (20 år) er fullført (odelshevdaren/odlaren).

Utvalet drøftar fleire modellar for avgrensing av odelskrinsen, (side 98)

- 1) Berre den siste odelsberettiga eigaren sine barn har odelsrett.
- 2) Berre barn av ein odelsberettiga eigar (noverande eller tidlegare innan same odelslekt) har odelsrett.
- 3) Dagens ordning oppretthaldast med den modifikasjon at ”nokon av foreldra, besteforeldra eller sysken av foreldra” må ha eigd eigedomen med odelsrett i ei viss tid, for eksempel 5 år.

Modell 1 inneber at når A døyr, kan barna a, b, c og så bortetter kreve odelsretten, som då får om lag same innhald som åsetesretten. Når A sel eigedomen, kan barna a, b og c gå til løysingssøksmål mot ervervar, der a vil ha best prioritet.

Modell 2 vil gi same utslag som modell 1, med den forskjell at odelskrinsen ikkje avgrensast til siste eigar sine barn. Siste eigar sine barn vil kunne ha fortrinnsrett framom barn av tidlegare eigar, med mindre desse kunne ha løyst eigedomen etter reglane i § 41, jf. § 40.

Modell 3 vil ta vekk problemet med ”refleksodel” – det at eldre menneske nyttar sin odelsrett for at fjernare slektningar (i høve til § 8) får odelsrett. Dette vil likevel skape problem i dei tilfella A døyr i sin beste alder, og kun har eigd garden i kort tid, ettersom barna til A då ikkje vil få odelsrett.

*Fleirtalet* (fem) vil ikkje endre odelskrinsen, og vil såleis halde på odelskrinsen slik den er i dag. Dei meiner modell 3 vil verke urimeleg og tilfeldig, og at modell 1 og 2 er praktisk gjennomførbare, men at desse vil gjere eit for stort innhogg i dei tradisjonelle oppfatningane knytt til odelsretten. Dei peiker på at barnlaus eigar av landbrukseigedom kan ha eit tett forhold til nevøar/nieser, og elles at avgrensning av odelskrinsen til modell 1 eller 2 vil kunne få konsekvensar for eldre sysken si utnytting av odelsretten – eksempelvis slik: I

syskenflokken er det semje om at nr. 2 bør ta over eigedomen etter foreldra. Etter dagens reglar kan det vere av betydning at den eldre veit at dersom nr. 2 ikkje blir sittande med eigedomen, vil odelsretten ikkje vere definitivt tapt, jf. § 41 andre ledd med vising til §§ 42 og 43. Med den avgrensninga som modell 1 eller 2 fører med seg, vil barna til den eldre i syskenflokken ikkje ha odelsrett, og dette kan føre til at den eldre finn at han/ho likevel vil nytte sin odelsrett for å sikre barna sine.

Fleirtalet vil ha inn ei presisering om at (tidsavgrensa) tingsrettsleg sameige av odlingsjord ikkje gir grunnlag for odelsrett for etterkomarar av dei som satt i slikt sameige. Dette gjerast ved at § 8 første ledd blir som følgjer: "Utanom odlaren får også etterkomarane hans odelsrett dersom nokon av foreldra, besteforeldra eller sysken av foreldra har ått *heile* eigedomen med odel". Det blir då gjort unntak for tilfella der eigedomen ligg i sameige, jf. ovafor om forslaget om at sambuarar kan samodle.

*Mindretalet* (tre) meiner at odelskrinsen bør sanerast slik at odelsretten i prinsippet kun gjeld for dei som har vakse opp på eigedomen. Dette vil i dei aller fleste tilfella vere situasjonen der det er foreldra som har eigd eigedomen med odelsrett. *Mindretalet* foreslår såleis at odelslova § 8 endrast slik at kravet er at foreldra eig eller har eigd heile eigedomen med odelsrett – jf. modell 2 ovafor.

*Mindretalet* meiner at den situasjon der eit eldre sysken overtar garden for å unngå at barna ikkje mister odelsretten slik fleirtalet nemner, ikkje er tilstrekkeleg grunnlag til å oppretthalde odelsretten for dei personar som normalt ikkje har nokon spesiell tilknytning til ein eigedom. *Mindretalet* peiker også på at langt dei fleste løysingssaker kjem som resultat av at barna på eigedomen ikkje ønskjer å overta eigedomen der eigar og den næraste familie er samde om sal – slik at det er fjernare slektningar (eksempelvis syskenbarn) som vanskeleggjer sal til personar utan odelsrett.

Når det gjeld tilfella der ein barnlaus eigar har eit tett forhold til nevøar/nieser, vil ei innsnevring av odelskrinsen ikkje hindre at eigaren kan selje eigedomen frivillig til den nevø/niese eigaren er knytt til.

*Mindretalet* vil ta inn same reservasjon mot kravet om at odelsrettshavaren av foreldra har ått *heile* eigedomen.

*Jordbrukssjefen sluttar seg til mindretalet sitt forslag.*

### **Odelslova § 20 – overdraging til annen enn den med best rett**

I odelslova § 20 står den viktige regelen om interpellasjonsrett – at eigar som ønskjer å selje eigedomen til eit yngre barn, gjennom ein formalisert førespurnad til dei eldre kan få bringa på det reine om desse er interessert i å nytte sin odelsrett. Dersom dei eldre svarer nei, eller ikkje svarer i det heile innan 6 månader, kan eigedomen seljast til den yngre på dei vilkår som gikk fram av tilbodet. Dei eldre kan då ikkje løyse eigedomen frå den yngre. Dei taper då ikkje odelsretten sin, men prioritetsmessig blir dei ståande etter ervervaren eller denne si linje. Svarer ein av dei eldre ja til tilbodet, er eigaren ikkje forplikta til å selje til vedkomande.

Utvalet meiner denne ordninga i hovudsak har verka gunstig, og foreslår at ordninga utvidast til å gjelde når eigaren ønskjer å selje heile eller delar av eigedomen til andre med odelsrett (eksempelvis nevøar/nieser, og det finst andre med betre odelsrett) eller til personar utan odelsrett i det heile.



Fristen for å svare på eit slikt tilbod er i dag 6 månader. Utvalet foreslår å korte den ned til 2 månader, dette for å skape samanheng med forslaget under pkt. 6.10.1 (alminneleg løysingsfrist kortast ned frå 1 år til 6 månader, jf. § 40).

Jordbrukssjefen seier seg samd i forslaget, og meiner det er ein fordel at seljar av odlingsjord i større grad kan avklare om personar med (betre) odelsrett vil nytte seg av retten. Ein kortare svarfrist vil vidare gjere det enklare å planlegge om salet let seg gjennomføre, og likevel gi odelsretthavarane den tid dei treng til å vurdere tilbodet.

*Jordbrukssjefen sluttar seg til forslaget frå Utvalet.*

### **Odelslova § 21 – når løysing er ”klårt urimeleg”**

Etter § 21 kan prioritetsrekkefølga mellom dei med odelsrett fråvikast dersom det vil vere ”klårt urimeleg” å drive den dårlegare odelsretthavaren vekk frå eigedomen. Første ledd gjeld forholdet mellom sysken, andre ledd mellom andre personar med odelsrett. Eit typisk eksempel er der eit yngre sysken har tatt over eigedomen etter mor/far blir utsett for løysingssøksmål frå eit eldre sysken. Spørsmålet har vore oppe for Høgsterett ei rekkje gonger, og haldninga har vore klart restriktiv på bakgrunn av faren for at det blir vanskeleg å sjå korleis framtida til bruket blir dersom § 21 blir nytta i utstrakt grad.

Utvalet foreslår at også dei som har overdratt eigedomen utan å ha odel på denne, skal kunne nytte seg av § 21. Utvalet viser til eksempel (s. 112) som at grannen har leigd og drive eigedomen i mange år og til slutt får kjøpe denne, og då blir møtt med løysingssøksmål – eller at grannen sine barn på det næraste har vore fosterbarn for barnlause eigarar. Utvalet føresett at løysingsmannen må stå sterkare her enn i dei situasjonane han konkurrerer med ein odelsberettiga.

Utvalet har einskilte merknader til samisk rettsoppfatning, der det yngste barnet har best odelsrett.

*Jordbrukssjefen sluttar seg til Utvalet sitt forslag.*

### **Odelslova § 25 – fråskrivning av odelsretten**

Etter § 25 er det høve til å skrive frå seg odelsrett. Av omsyn til å skape klar dokumentasjon om spørsmålet om det er gitt avkall på odelsretten eller ei, foreslår utvalet å føre inn eit skriftkrav.

*Jordbrukssjefen sluttar seg til forslaget.*

### **Om bu- og driveplikt (§§ 27-29)**

Etter odelslova § 27 får den som tar over ein eigedom ved odelsløysing personleg bu- og driveplikt i 10 år. Dette i motsetnad til normaltillfella, som etter § 27 andre ledd gir 5 år personleg buplikt, medan driveplikta her anten kan oppfyllest personleg (5 år) eller ved bortleige som tilleggsjord i minimum 10 år.

*Fire av medlemane i Utvalet* meiner det ikkje er grunn til å endre på regelen om at overtaking ved odelsløysing gir 10 års personleg bu- og driveplikt, og at det elles er logisk å ha reglane om bu- og driveplikt for odelseigedomar i odelslova. Ei eventuell harmonisering med reglane om bu- og driveplikt bør, om naudsynt, vere slik at konsesjonslova viser til odelslova sine føresegner på dette området.

*Fire andre medlemar* meiner at 10 årsregelen ved odelsløysing bør gå ut. Desse medlemane

tar som utgangspunkt at når ein odelsrettshavar overtar ein eigedom, har vedkomande bu- og driveplikt. Det leggst til grunn at bu-/driveplikta for odelsrettshavaren lik som for andre har si forklaring i landbrukspolitiske og samfunnspolitiske omsyn. Dette bør ha som konsekvens at pliktida, og fritaksadgangen, må vere den same for eigar med odelsrett og eigar som ikkje har odelsrett. Det er vidare ikkje grunnlag for å ha særreglar med omsyn til bu- og driveplikt for dei tilfella eigedomen blir overtatt ved løysingssak (10 års personleg bu- og driveplikt). Desse medlemmane meiner dagens føresegner har eit preg av å ville straffe løysingsmannen, som på si side kun har nytta seg av den løysingsadgang lova gir høve til. Vidare meiner dei at reglane om bu- og driveplikt bør harmoniserast og samlast i konsesjonslova.

Det kan vere vanskeleg å orientere seg i gjeldande regelverk på området, og ei harmonisering og samling av regelverket bør gjerast i konsesjonslova. Vidare bør særregelen om 10 års bu- og driveplikt i løysingstilfella bør fjernast.

*Jordbrukssjefen sluttar seg til uttala og forslaga om å endre 10-årsregelen ved odelsløysing..*

## **Kapittel X – preskripsjon/forelding (§§ 40-48)**

Odelslova § 40 har reglar om forelding (preskripsjon) av odelsrett/løysingsrett.

Hovudprinsippet er at ein person med odelsrett må gjere sin rett gjeldande innan eitt år etter eigedomsovergang (tinglysing eller bruksovertaking) til ein framand utan odelsrett eller til ein med dårlegare odelsrett.

*Eit samla Utval foreslår at løysingsfristen blir korta ned til 6 månader, som er i samsvar med lov om løysingsrettar av 9. desember 1994 nr. 64. Vidare at det alternative utgangspunktet for når løysingsfristen på 6 månader tar til å løpe fell vekk (§ 40, andre ledd: "Ved friviljug overdraging skal fristen likevel først reknast frå bruksovertakinga, dersom denne skjer seinare enn tinglysinga av heimelsdokumentet")*

Det er fornuftig og ryddig å ha kun *eitt* utgangspunkt med omsyn til når løysingsfristen tar til å løpe – frå tinglysingsdato.

Spørsmålet om løysingsfristen si lengde må kvile på ei avveging mellom omsynet til at odelsrettshavarane må få tilstrekkeleg tid til å tenkje over om dei skal ta over eller ei, og omsynet til at ny eigar skal få ei rask avklaring av om han/ho får behalde eigedomen. Dei odelsberettiga må få tid til å skaffe seg kunnskap om at ei overdraging har skjedd, då dette ikkje "flaggast" i alle tilfelle. Ein er noko i tvil om 6 månader er tilstrekkeleg i sistnemnde tilfelle. På den andre sida er det etter dagens forhold ikkje vanskeleg å skaffe seg kunnskap om kven som står med heimel til ein eigedom, og såleis kan ein gjennom kortare løysingsfrist kanskje pålegge odelsrettshavarane ei noko større handleplikt. Omsynet til odelsrettshavarane vil framleis vere godt stetta med ein løysingsfrist på 6 månader.

*Jordbrukssjefen sluttar seg til Utvalet sitt forslag.*

## **Odelslova § 78.**

*Eit samla Utval foreslår å modernisere § 78, slik at føresegna kjem i samsvar med dagens rettsoppfatning. Dagens § 78 diskriminerer framleis kvinner i forhold til brør eller onklar født før 1965, samt adoptivbarn og barn født utanfor ekteskap før 1965.*

Etter jordbrukssjefen si oppfatning er det ein stor fordel om reglane om odelsrekkjefølgja blir meir oversiktleg, då det i dag kan vere vanskeleg å få klargjort kven som har best odel til ein eigedom. Dette gjeld særleg der både gamal og ny odelslov kjem i bruk.

*Jordbrukssjefen sluttar seg til Utvalet sitt forslag.*

**INNSTILLING:**

- 1. Rauma kommune går inn for at odelsretten blir avvikla.**
- 2. Under føresetnad av at odelsretten består, går Rauma kommune inn for ei omfattande modernisering av odelslova i samsvar med vurderingane i saksutgreiinga.**

**16.06.04 UTVALG FOR UTBYGGING TEKNISK DRIFT NATUR OG MILJØ**

**TM-089/04 VEDTAK:**

Enstemmig vedtak :

1. Rauma kommune går inn for at odelsretten blir avvikla.
2. Under føresetnad av at odelsretten består, går Rauma kommune inn for ei omfattande modernisering av odelslova i samsvar med vurderingane i saksutgreiinga.

*SMH*